



Sujet 2019 Feschthütte Oberwil wo bisch?

Dorf-Fescht do und Dorf-Fescht dört,
überall sind si am feschte, wie isch das gschört,
drum sag ich dir jetzt öbbis, muesch guet lose,
bi de Schnägge in Oberwil herscht toti Hose.

Bi de Wäiechöpf in Binninge schwingt me s Bäi,
bi de 99-er in Therwil feschtet me bis am zwäi,
bi de Gugger in Ettinge goht d Party ab, bis me käi Luscht me het,
und bi de Schnägge in Oberwil löscht me s Liecht und goht ins Bett.

Käi Ändi in Sicht, mir grust's jetzt scho,
wotsch z'Oberwil in Usgang go,
e chli Eierläset, e weneli 1. Auguscht, jo das isch no flott,
und denn ab ins Bett: "guet Nacht bi Gott"!

Wenn git's emol wieder e riese Fescht in Oberwil,
mit Musik, Feschtbetrieb und Spiel!
Okay, feschte chöntme scho in Oberwil und das nid z`knapp,
chum ans d'Spezi Clique Grümpeli dört goht Poscht ab.

D' Gmäindsverwaltig mit em Gwärbverein Oberwil lade zum "Azünde" i,
wäge de neue Wienachts-Belüchtig soll das e so si,
d Carbone-Crew git wie immer s Bescht,
und scho git's e kläi Iteliäner-Fescht,
aber scho bald wird zäme grumt, wils käini Oberwiler am Fescht me het,
denn ab de siebeni göhn d Schnägge jo bekanntlig häi ins Bett.

Wotsch wüsse wie me e tolls Feschtli macht,
aber eins wo öbbis lauft und's kracht,
die vo de Schnägge-Gemeindsverwaltig hän's do nit wit,
nur über d Hauptschtroos und "händ e schöni Zyt"!
Musig, e Zält, öbbis zum Ässe und Bisse, "was wotsch no me",
und tout Oberwil het me bim Carbone chönne gse,
bim organisiere bruchts halt Gschpür und e bizzeli Muet,
e chli südländischs Bluet in d Suppe und denn chunts scho guet,
und wüsstet ihr nit wie fescht dass salze muesch d'Suppe,
denn frog doch die Schlofchappe vo dr Wärkhoftruppe.

Höggle, träume, tringge, ässe,
gniesse und de Schtress vergässe,
anderi düen für di rottiere,
rüschte, koche und serviere,
Auge ha für s Bild vom Täller,
d'Zunge für de Saft vom Käller,
s' Muul zum anderi fründlig gniesse
und s Härz zum alles könne gniesse,
öb es Waldschlössli-Bier tringgsch oder e Wyy,
es darf au e Gyn-Tonic vo de d'Spezi si,
durch unseri Odere fliesst reins Fasnachtsbluet,
mir sage Euch, es wird alles guet,
denn mir d'Spezi mache halt keini halbe Sache,
göhn nit ins Bett um s Liecht uszmache....